

ÁRANGURSSTJÓRNUNARSAMNINGUR

milli umhverfísráðuneytis og Skipulagsstofnunar

I. Tilgangur

Með samningi þessum er kveðið á um gagnkvæmar skyldur umhverfísráðuneytis og Skipulagsstofnunar við útfærslu á lögbundnu hlutverki stofnunarinnar. Tilgangurinn er að festa í sessi ákveðið samskiptaferli milli ráðuneytisins og stofnunarinnar ásamt því að leggja grunn að áætlanagerð og mati á árangri af starfsemi hennar. Með áætlunum sem samkomulagið kveður á um er mótuð stefna til næstu ára. Þessar áætlanir eru stefnumörkun Skipulagsstofnunar, verkefnaáætlun og rekstraráætlun.

Samningurinn breytir í engu ábyrgð ráðherra gagnvart Alþingi á rekstri stofnunarinnar eða þeim skyldum sem stofnunin hefur samkvæmt lögum. Þá ber stjórnvaldsábyrgð ráðherra með sér að hann getur felld samninginn úr gildi ef ekki er staðið við ákvæði hans.

II. Hlutverk Skipulagsstofnunar.

Skipulagsstofnun er ríkisstofnun undir yfirstjórn umhverfísráðherra. Stofnunin starfar eftir skipulagslögum nr. 123/2010; lögum um mat á umhverfisáhrifum nr. 106/2000 og lögum um umhverfismat áætlana nr. 105/2006.

Verkefni Skipulagsstofnunar samkvæmt lögum eru:

- Að hafa eftirlit með framkvæmd skipulagslaga og reglugerða settra samkvæmt þeim
- Að veita upplýsingar og leiðbeiningar um skipulagsmál
- Að fylgjast með stöðu skipulagsmála í sveitarfélögum
- Að aðstoða sveitarfélög og leiðbeina þeim við gerð skipulagsáætlana
- Að láta í té umsagnir um ágreiningsmál á sviði skipulagsmála
- Að sjá um að upplýsingar um áætlanir um landnotkun á landsvísu séu fyrir hendi og gera tillögu að landskipulagsstefnu
- Að annast og stuðla að rannsknum a sviði skipulags- og byggingamála í samvinnu við hlutaðeigandi stofnanir og hagsmunaaðila, svo og að annast eða stuðla að útgáfu upplýsinga um þau mál
- Að annast umsýslu Skipulagssjóðs
- Að framfylgja ákvæðum laga um mat á umhverfisáhrifum og vera ráðgjafar um framkvæmd þeirra
- Að veita og gefa út leiðbeiningar um umhverfismat áætlana
- Að fylgjast með framkvæmd umhverfismats áætlana

III. Markmið og áherslur

Stefna og markmið Skipulagsstofnunar eru skilgreind í fylgiskjali sem nefnist “**Verkefnaáætlun Skipulagsstofnunar 2010**” og er hluti af samningi þessum. Í verkefnaáætlun er sett fram stefna til næstu þriggja ára og mælikvarðar sem mæla árangur verkefna stofnunarinnar. Skjal þetta mun

taka breytingum árlega í samræmi við þróun þá sem leiðir af framkvæmd og eftirfylgni markmiðanna.

IV. Ábyrgð og skyldur Skipulagsstofnunar.

Skipulagsstofnun skal annast þau verkefni sem stofnuninni eru falin skv. lögum og reglugerðum. Fjármálastjórn Skipulagsstofnunar skal vera í samræmi við verklagsreglur fjármálaráðuneytisins um framkvæmd fjárlaga, rekstur og stjórnun ríkisstofnana í A-hluta, svo og ákvæði laga nr. 88/1997 um fjárreiður ríkisins.

Stofnunin skuldbindur sig til að haga rekstri sínum þannig að útgjöld séu innan fjárheimilda og fjármunir séu nýttir á árangursríkan hátt.

Skipulagsstofnun skal gera áætlun um rekstur sinn og viðfangsefni fyrir eitt ár í senn.

Skipulagsstofnun skal 1. desember ár hvert skila ráðuneytinu ársáætlun fyrir næsta ár sem innihaldi bæði rekstraráætlun fyrir komandi ár ásamt verkefnaáætlun þar sem tiltekin eru markmið og mælikvarðar innan ársins á grundvelli langtímaáætlunar.

Skipulagsstofnun skal í upphafi árs skila inn niðurstöðu verkefnaáætlunar liðins árs og gera grein fyrir hvernig stofnuninni gekk að ná þeim markmiðum sem sett voru fyrir undangengið ár.

Skipulagsstofnun vinnur að jafnri stöðu kynjanna í starfi sínu.

V. Ábyrgð og skyldur ráðuneytis.

Umhverfisráðuneytið skal kynna Skipulagsstofnun tímanlega nýmæli og breytingar á lögum og reglum sem varða starfsemi stofnunarinnar og hafa samráð um mat á kostnaði vegna slíkra breytinga.

Ráðuneytið leggur mat á árangur Skipulagsstofnunar um framkvæmd þeirra verkefna sem samningurinn kveður á um. Mat þetta skal liggja fyrir eigi síðar en mánuði eftir að stofnunin hefur skilað inn gögnum fyrir undangengið ár.

VI. Gagnkvæmar skyldur

Mikilvægt er að fjárveitingar til starfseminnar séu nægjanlegar til að stofnunin geti sinnt skyldum sínum, þróað starfsemina og búið við góða starfsaðstöðu. Í sameiningu munu samningsaðilar vinna að því að styrkja fjárhagslegan grundvöll stofnunarinnar.


Stefnt skal að því að halda árlegan fund ráðuneytisins með Skipulagsstjóra um málefni sem varða hann sérstaklega.


VII. Gildistími og endurskoðun samnings

Samingurinn tekur gildi við undirritun og getur hvor aðili um sig óskað eftir endurskoðun samningsins.

Samningur þessi er gerður í tveimur samhljóða eintökum og heldur hvor aðili sínu.

Reykjavík, 21. desember 2010.


Svandís Svavarsdóttir
umhverfisráðherra


Stefán Thors
Skipulagsstjóri